



Овс мув шимдаң мир хоятат улапса альсат

Хор: Россия МИД пресс-служба



Там лапатан Ямал мув хоятлүв Москва воша яңхсат. Щита лув Российской Федерация Министерство иностранных дел хотан альсат, хоты округеван шоши мир хоятлүв улдат. Щи вер лув Хон мувеван улты шимдаң мир хоятат хатла постасэл.

Там уйтантапсайн РФ Министр иностранных дел лаңкар Александр Глушко ус. Лув тумпелан 28 хон мув дипломат. Щи кутан усат: Китай, Сингапур, Республика Корея, Малайзия па Тайланд, па па волаң хон муваң кушайт.

Муң округев элты яңхам хоятат потар тусат, хоты сахат там хатлатан шоши шимдаң мир хоятлүв улдат. Муй хорпи рупата тула улапса ямашак па кенашак манты ураңан. Ар нэтапса верла энамты няврэмат кеша. Там мосванан щимащ нэтапсайт рупитлат:



ун тахаята велци уталтыты манты няврэмат охан нётдайт, хот миталаты верэл ищи сохаштала. Ванты, щи порайн лувилала кеншак питал, па велци питшам ятэл элты эхлы ант карэмалат.

Шимдаң мир хоятат ясаң, улапса шавиты па елды туты щирани ищи ар нэтапса ул. Ин касдыман яңхты хоятлүв хотэл тайты щирани мосты пормасан иса мийдыдайт. Щалта па няврэм сэма питтыйн, па регионат пидан артадаман, ищи шеңк ун вер тула.

Уйтантийм хоятата шеңк умац ус вантты, хоты сахат Овс мув шимдаң мир хоятат улдат. Муй хорпи хотат, думтамат, пормасат тайлат. Кашң хоят верытас лэтот давемиты, хорамаң ар хулантты.

Тамаш уйтантапсайт онтасан аршак па муваң мират муң Овс, па па шимдаң мират



элты уйтты питлат. Хон мувеван арсыр мират улдат, щи веран кашң отэв ияха, матты ки яй па апщи сакқан.

Аллина Тоярова ханшам потар

Касапсая пилтацияты

Округ шоши мир няврэмата, хой «Овс мув ольпат» региональной касапсайн касты угсийл, холна каматса хатл хасяс. Ас нопатты тыдась хусмет хатл унты ханшам хорат па потрат китты мосал.

Яң тал элты нийлхус тал унты эвета па похата русь, ур, ёрн ёх, ханты па саран ясаңан потар лэсятты мосал па си потар хуват хор ханшты. Хорат ар сирн сюратты рахал: ал ханшты юхан лэсятты, рахал ольпаң хорат китты.

Там тал Хон мув мир ёх ияха пилтацты Тада, округеван – яммалтаты па таксарлаты Тада постаман ул. Сишан сит элты па ханшты рахал. Хут номинация элты пирыты. Монсь, письмо, сочинение сирн лэсятты:

– «Чумовая история». Хоты ур хот лонсьда, муй элты верман ул, муй пормасат лыпийн тайл;

– «Семейные традиции». Муй хорпи хоттэл улапса тайлаты.

– «Традиционная одежда». Муй хорпи сохан яңхлаты? Муй нэм лув тайлат? Муй порайн лувилал тайты рахал.

– «Традиционные игры и игрушки». Шоши мир ёх ёнтопсайт па ёнтотат.

– «Формула здоровья» ул. Муй верлаты, тумтака улты ураңан.

– «Мелодии дружбы народов». Хоты хон мув мир ёх няврэмат яха улдат па уталтылат. Хоты симась хоттэлдатан хоятат улдат, муй емаң хатлат тайлат.

Рупатайт там электронной почтая polar.kraski@yandex.ru китаты. Рахал Пулцават вош Гаврюшина вошхулыя 17-мет хота, шоши мир ёх департамента туты.

Альбина Тырлина ханшам потар



Хор: Милана Сераскова

Нётты пормас иса мосал

Волаң Ляльн нох питам хатл постаты едпийн, СВО харан улты ёх хоятлүв ищи нётапса туты пормасатан китсайт. Щита улты мохет пидан округ куцаев ван кут потрэмийд. Хун муй нётапса мосал иса ястаты па айкед китты партладды.

Ас нопатты тылащан, ихощъяң военной часть ядпа тувам машинаятан тэкаптаса. Ляль хара ёхтаптам машинант кутан – мув хирты йи машина, лапатхощъяң квадроцикл, атом юш хуват манты кат юраң машина, хоят такды яңхты нийдхус тохлаң хоп. Щи тумпийн, айкед туты па лув кутладан потрэматы катсот педа хус хошап па кат щёрас педа нядсот эд сайлаты пормас па думатты сох китса. Пошкандал, пормасдал дэщатты катдантыты картэт, улты тахайдал щира верты ураңан, сохлат, картлүңкат, парцинат тохи тусайт.

СВО питщам эдты, доваталан нядсот арсыр машина, хоят такды яңхты кат щёрас тохлаң хоп, ветсот потарты хошап щиедт педа китса. Там йисан, ляль харатан улты ёхлува па лув хоттэл мохилал ураңан, нийдъяң арсыр нётапса вер дэщатман ул. Ялап нётапса щират ядпа па этлат.

Зоя Куртямова ханшам потар



Хор: Анна Лыскова/АНО «Ямал-Медиа»

Емаң хатлэд постасэл

Округеван там талэв хоят педа кератман ул, яммалтаты па таксардаты Тада постаса. Хон мувев хуват Ас нопатты тыдась катхосьяңмет хатадан леккарата нётты хоятат емаң хатлэд постасэл.

Дорвош район леккар хотан ярсот педа нийд нэ па хулам ёх симась хоят рупитал. Лув кутэдан ведси рупитты питсям айлат ёх, улдат хоятат, хойтат ултэд сыс си рупата тулат. Симась хоятат кутан – Валентина Даниловна Вакуленко Горка вош эдты. Дорвош районан лув мет хув рупитал. Антом туп куртадан, округ хуват уятла.

1976-мет талан Пулңават вошан медучилище етшаптас. Хольмаң педа нял талд Хашкуртан рупитас. Няврэмат сэма питыдысат, хонсяпсайт эдты куртаң хоятдал яммалтыйс па нох пайтыдыйс. Си юпийн, Горка вош «Северяночка» ай няврэмат хатл сыс яңхты хотан ун леккар нэңа ус. 2016-мет тал эдты ашкуда-интернатан рупитал.

Валентина Даниловна рупатайд самаңа тайдалды. Няврэмат па рупитты хоятдал педа шеңк вецкат хоят. Нял няврэм энмалтас. 2017-мет талан едта холна хулам няврэм ус, лувидал тайдалды.

Ханты нэңиев рупатайд тумпийн ёнтасал, верантал, ханты па русь ясаңан луңтарат ханшал. «Лух Авт» па «Северная панорама» газетайңан хося, «Северяне» журналан



Хор: vk.com/muzhi_crb

Валентина Даниловна Вакуленко



Хор: Альбина Тырлина

рупатайдал этдысат. Кат пуш Иван Истомин нэмпи литературной премияйн юкантман ус. «Истомия» творческой клуба луңтасал, шоши мир ёх форуматан, ашкудайн манты емаң хатлата пидтасял. Няврэмат пидан уйтантопсайт дэсятал. Ханты хоятлүв улапса, арлүв, луңтарлүв эдты потар тул. Сохлүв, пормаслүв, дэтотлүв эталтал.

Валентина Даниловна, пумасипа наңена! Си волаң вер туты кашң хоята мойлапса ясаң китлүв. Тумтак ёш, тумтак кур!

Альбина Тырлина ханшам потар

Пормасат туса нёхарты хоятат мойлаптадайт

Там талан хон мувев хуват туса пормасат эватты, нёхарты хоятат олаң пуш национальной премияйн мадайт. Сит эдты правительство куся ху Михаил Мишустин нэпек ханшас.

«Симась охаң мойлапса яң номинация хуват маты питда. Мет тусшак пормас эватты хоят, мет тусаңа вератты знаматы ёх, мет тусшак вератты хот», – хон мув правительство прессслужба сайтан ясаң верса. Щита луңталдн.

Си вер едды туты общественной, образовательной па наставнической проектат холна охан нётдайт. Атэд мойлапса шитлат, хой



Хор: Альбина Тырлина

нёхаратты, эватты тахаята сютсаяты яңхты хоятат тутдылат па си вер па верам пормасат эталдылат.

Касапсая заявка нэпек местной самоуправление органат,

лүв ёрая рупитты па самозанятой хоятат китты верытлат. Пормасат верты па тыныты верат туты министерство хося си вер ураңан атэд совет акатла. Тохи лоңам ёх тусаңа вератты ёх пырылат. Там талан нох питам тус ёшаң хоятат нэм ишакты нэпекатан па кев хоратан мойлаптадайт.

Вератты хоятат щёхар тыдась яртъяңмет хатл эдты хуламхосьяңмет хатл унты «Душа Севера» касапсая Пулңават воша хасям ята ёхатлат. Там вантопса Хон мув мир ёх единство Тада па округеван мет одңа тамась вер пуншам хоята – Сергей Лугинина постада.

Альбина Тырлина ханшам потар

Муев сыстамптаты вер щира рупитал

Муң ханты шоши хоятлүв арсыр тахаятан рупитлат. Айдат хоятлүв нох, уншак тахаята уратлат. Там потар шупеван Алексей Германович Куртямов эдты ханшлүв. Ин лүв ООО «ЭкоЦентр» хоца одаң даңкар куца рупитал.

Алексей Германович ханты хоттэд хоятат хоца, унт дор тыдац 1990-мет талан Мужи вошан, сэма питас. Ащел, Герман Егорович Куртямов, Асов курт эдты ул. Советской Союз порайн кина понман рупитас, щи юпийн нови тут лэщатман па хотат омасман, пенсий унты, рупитас. Антел – Валентина Ефимовна Куртямова (Ребас) – Айвошнэ. Удтал хуват, леккар нэтты нэңа, 40 тал Мужи вош леккар хотан рупитас. Лын кат похие па эвие вещьката па ошаңа энмалсаңан. Ин па хидыдал энмалты нэтдаңан.

Алексей Куртямов 1997-мет талан Мужи вош ашкулдая манас па 2008-мет талан етшаптасды. Уталтыйм сыс арсыр олимпиадайт ханшас, ашкула каш верты лотата яңхас. Яма уталтыйм ураңна, приоритетной национальной проект «Образование» щиран Лорвош район куца эдты премияйн мойдам.

– Ашкулайн уталтыйм урокдам удтэм хуват манэм шеңк нэтлат. Шеңк ям уталтаты нэңат манэм уталтысат, – Алексей ястас. – Щиты ма уталсам верты вердам паты унты туты. Хон Петра вошн, 2013-мет талн, политехнической университет «Менеджмент организации» педа уталтыты етшаптасам. Мужи воша мохты ёхатсам па управление социальной защиты населения хоца рупатая доңксам.

Кимет талн лүв, АО «Ямал-коммунэнерго» Лорвош район филиал хоца, рупитты вохса. Щита нядлэм тал рупитас па 2018-мет талн Пулцавта вохса. ООО «Салехардский комбинат» хоца рупитас – мир доват арталас, тащ лэщатам худаң хошапат холта киттыя мослат.

2020-мет тал эдты Алексей шоши муев сыстапман рупитты питас. ООО «Ямал Экология» хоят пидан рупитты управление хоца куца понтса. Щита



Антел Валентина Ефимовна па Егор айд пидан.



СВО педа нэтап пормасат акатман «За мужество и гуманизм» нэмпи мевал посан мойдаптаса.



Хор: Алексей Куртямов

яма рупитмал ураңна, 2022-мет талн Новый Уренгой филиал АО «Ямалэкосервис» хоца куца рупитты китса. Рупатайл хоца 65 хоят луңтасман ул. Лүв иса, вош нампар эдты сыстапман, рупитлат. Актан нампрат ияха акатлат па машинаятан йи лота тулат.

Самаңа па яма рупитмал ураңна, арсыр ицканцап нэпекатан мойдыдыса: Тюменской областной Дума, Региональный

оператор ООО «Ямал Экология», Новый Уренгой куца эдты благодарность нэпекат. Тунял па, Новый Уренгой сэма питам хатадн, яма рупитам ураңна, памятной карты охан юкантам. Вош куца даңкар ху, Иван Алексеевич Нефилов ястас: «Хун Алексей Куртямов ты рупитты китса, щи пора эдты вошев сыстамшака йис – нампрат иеван акатлайт па йи лота тулайт. Щи тумпийн

кимет рупата щиран лүв иса онтас па нэтап верал».

Рупатайл яма верты тумпина, Алексей Германович ал щиты ант омасал. Ийимел пидан худаң няврэм энмалдаңан. Ям верат верты лувилал уталталдал, иса патан тутдылдал. Вошаң хоятат пидан уйтантыман, СВО ляль харат педа нэтап пормасат акатлат па китлат. Тампуш, Ямал муев общественной организация «Ассоциация ветеранов боевых действий органов внутренних дел и внутренних войск России» эдты «За мужество и гуманизм» нэмпи мевал посан мойдаптаса.

Ин, Алексей Куртямов хоттэд хоятлал пидан Ростов-на-Дону нэмпи воша каслас. Тохи ООО «ЭкоЦентр» хоца одаң даңкар куца рупитты вохса. Лүв па елды тумтака, ошаңа па вещьката ат рупитал!

Иван Сандрин ханшам потар

Муң нумлэв, муң ант ёрэмалэв

Туныл, Волаң Ляльн нох питам нийлгьяңмет талэв постатэван, «Арктическая эстафета Победы» ус. Ляль порайн тайм хорпи Вотвой, лонцхопатаң, вулэң па амп ухлатан тувман, дохан шушман Саха (Якутия), Чукотка, Красноярской мув сыдат дарытман, Ямал мувева ёхтаптаса.

Там вер лэцатам ёх, хоятат пидан уйтангымед порайн, Волаң Ляльн парам ёх элты потрат, айкелат, нэпекат акатсат. Ун кер тылащ хольмаңмет хатадан, Хон мувеван улты Овс мув шимлаң мир хоятат емаң хатл постатыйн, луңатты щира талана лэцатам «Ямальские лица Победы» нэпек хоятата эталтаса.

Луңатты нэпекан Волаң Ляля яңхам па щир талатан вецката рупитам, волаң мевал посатан юкантам хоятат элты потрат ханшсайт. Лув кутэдан ханты па ур хоятат ищи улдат.

Тата елды, Михаил Иванович Рускаламов элты потар манал. Лув нэмад ищи луңатты нэпека понман ул.


Мувев сайдаман юр ант щалитас

Михаил Иванович Рускаламов 1921-мет талан Лэпатнаңк куртан сэма питас. Ащел вой-хул велдаслаты хоята ус. Щит ураңан, ханты похие ай тэдан дохан яңхты, холап вантты па вой велты шеңк яма хошас.

1937-1939-мет талатан, яма уталгыман, Пулцават политпросвет ашкулда етшаптас. 1940-мет талан солтана уда.

Волаң Ляль питщам порайн, олаң хатлат элты Ленинград вош сайдаман ус. Старший сержант лаңкар постайс, 336-мет стрелковой дивизия отделение куцая понман ус па 125-мет стрелковой бригадйн пошкан нёл эсалты хоята луңтасас. Щита лялясман, лув мушмалса па ям хуват госпиталыан олас.

Юхат, Смоленской область Темкинской районан улты Назарьево курт пуңадан, ляль манам порайн, взвод куцайл паратса. Михаил хув ант нумасман, куцайл рупата лув ёшала усды. Нётапса ёхаттад унты,



яха улам ёхлад пидан, ям хув кут, немщат вана ант эсалдман тайсалдал. Лаңкар посаң икев щир порайн, немщат кутан хус молтаскем солтан па йи офицер паратас. Там ляль етшам юпийн, орден Красного Знамени мевал посан юкантса.

Жулица па Княжъя куртат пуңадан, 1944-мет талан, Михаил Рускаламов отделение ёхлад пидан ветгьяң педа вет немащ солтан велсат. Паратам хоятлад кутан офицерат па усат. Хус хоят дылда каталсат. Щи по-



Михаил Иванович Рускаламов
(1921-1945)

Ветеран Великой Отечественной войны 1941-1945гг.

райн Михаил лув ёша-кура, ветхощгьяң немащ паратас. Кат офицер па, дын пошкандан элты дылдал нох усды. Ванты, пошкан нёл нуша ус па кашң нёл луңатман тайса. Щи ляль юпийн, ханты хоятэв орден Славы III степени маса.

Германия хон мув унты ванамамелан, Новакс курт хоца, Одер ёхан уншты мосас. Немщат, рут мув сылэл шеңк такан аратысэл. Муң солтанлув хоты, метшак палтапды па апраца ешащсат. Михаил Иванович солтандал пидан ёхан унштэл порайн, немщат лув ещалт ар пуш дойдысат. Нял хатл сыс, хар тахайн, дый нялхощгьяң пуш немщат ёхды педа хаталтыслад. Муйкем немащ аршак ус, лув ант палман лялясты ёхлад пидан, нял пуш контратакая ещалт этдысат. Муң солтанлув шаңкап этман, немщат артан велдман, лув лэцатам харлад нох вуйдыслад. Дылд уты отадан хус немащ пайтас. Там ляляпса артамеел

юпийн, орден Славы II степени мевал посан юкантса.

Волаң Лялян, отделение куцая удмал сыс, тэдыя солтан уталтас. Муй щиран таксар, палтапды па юр ант щалитман рут мувед сайлаты мосал. Хоты дылдал шавиман, нумасман улты па дылда хащты.

Солтандал уталтаман, рут мувал сайдаман, муң ханты хоятыев па лув дылад щита сохнас. 1945-мет талан ай кер тылащ хольмаң педа лэпатмет хатадан, Германия хон муван, Михаил Иванович Рускаламов антома йис.

Щи пора элты ярсот педа йи тал хащас. Туп кашң тал, Ас нопатты тылащ яртгьяңмет хатадан айл-унал яха актащман, Волаң Ляльн нох питам хатл постадат. Мувев сайдам хоятлув нумман, Кев хор хоца лыптит тутат.

Муйкем тал ант ат хащал, там хатлэв, мувев сайдаман парам хоятлув иса нумман тайты питдалув.

Зоя Куртямова ханшам потар

Суюв омасты емаң хатадан сэма питмал

Тампуш Зоя Ивановна Куртямова 80-мет тал ловата йис. Ас нопатты тылащ 15-мет хатадан сэма питам хатлаң постас. Щиты нэпеклад хоща ханшман ул. Туңа-щира ки, Ас нопатты 6-мет хатадан лув сэма питас. Щи порайн Егор хатл па суюв омасты хатлат постадайт.

Аншикурт – щиты ханшман ул, лув сэма питам нэпеклад хоща. Лув хоттэл хоятлаң па опрацлаң щита ант усат. Сэма питты порайн, лув щи курт пуңал элты касалты юшел улмал. Щишан щиты нэпека ханшда.

– Ма сэма питсам, хун вуды тащ артан суюв омасты питас. Ащем, Иван Павлович Сандрин, шеңк нох амтас, хоты ай суюват кутан ай эвие там мува ёхтас. Таңха, Нярас ёх луңхатан, щиты партса, – ястал Зоя Ивановна. – Лув Вуюкуртаң ху. Щит Мужи вош элты антом шеңк хув, Катра Кев Авт Ас па пелакан послатан омасты куртые. Ащем вулэң тащ хоща кущая рупитас. Щишна лув хоятатан Куца Ванькая айдса. Хоят педа ям па потраң ус. Ма нялдем тал ловатан улмеман, лув роман антома йис. Щикем щаль...

Антел, Мария Ивановна Сандрина, туса ёнтасты па каркам нэ Хон рут элты улмал. Лув ийикел пидан нял няврэм сэма паватсаңан: Роман, Екатерина, Зоя па Федосья. Ийикел роман антома йис, щиты щи няврэмлаң энмалсалды. Няврэмлаң ун ащи – Павел Данилович па ун анти – Мария Васильевна (эви опрац нэмал Шонь, мосаң Шон), шеңк такан нётсаңан.

Волаң Ляль етшам юпийн кашң хоята яма рупитты мосмал. Щиты, Зоя Мужи вош ашкуда 7-мет класс етшам юпийн, мохты ёхи манас. Вуюкуртан усат. Щилта Ялап Кев Авт курт унты яңкем километра. Тохи, лув актама вонцапсайт па ведам



Хор: Татьяна Паршукова



Зоя па Владимир Ребась.

худат, хопан ловдасман тутдысат. Ёхды па лэтот пидан ёхтыдысат. Юхат па Катра Кев Авт курта касалсат па щита ялап хот омассат. Зоя ун ащела павартат кар элты сыстампты па нох талты нётас.



Хор: Иван Сандрин

Зоя Ивановна ун эвел пидан

Хус тал ловатан, Зоя Ивановна ху сая манас па Мужи воша касалсаңан. Антел па ун ащел патан вустан. Щи унты ун антел антома ювмал.

Ийикел, Владимир Александрович Ребась, вуды леккара рупитас. Катқан, няврэмлаң пидан вуды хотан яңхсатан. Худам няврэм сэма питас: Алла, Евгений па Александра. Няврэмлаң ай улмедан, ийикел антома йис, паратса. Щиты лув утца лувилал энмалты питсалды.

Юхат лув Иосиф Никифорович Куртямов пидан ияха улты питлаңан па ходна ай эвие моцатлаңан. Мария нэман нэматлаңан. Ай Маша антел па ащел хоттэл хоятат ияха акатты питсалды. Ин лув иса уна йисат па пидаңа мойлаты яңхилдылат.

Зоя Ивановна ултал хуват ар туса ёнтас. Лэцатом отлаң арсыр музейта мийман улдат. Яма рупитам ураңна район па округ ловатан элты ишканцап мойлап нэпекат тайл. Сэма питам хатлаң пидан! Ат па щиты елды вешкката па тумтака ул!

Иван Сандрин ханшам потар

Сорашак айкел моцатты ураңан

«Лух Авт» газета кашң лапат йи пуш этдыйл. Тухал ишан, ёхаттал унты талаң лапат хащал. Щи веран, сорашак айкедат моцатты ураңан, нынан мосал «Лух Авт» понылдыты айкедат «ВКонтакте» па «Одноклассники» хоща моцаттыты.

Щи ураңан там QR-код мохты доңаты, па муң верыдыты айкелдува ханшлтыяты. Кимет веран, айкел луңатты тумпийн, щита рахал ясаң ханшты, потраң сама ки рахас – пос понты.

Муң па, нын вантам айкелдан элты ищи нопсэв тыед-тохел понылдылэв, вантлэв – мата айкедат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасман елды тулэв, ханты мир ясцев шавилэв!



ОБЪЯВЛЕНИЕ

Там QR-код хуват доңаты па вантаты, муйсыр нётосайт СВО хоща улты мохета мадайт. Щи тумпийн нэңдала, няврэмлаңа, аңкидала па ащилала ищи нётоса вуты рахал.



Полная информация по телефону
 +7 (902) 816-11-90
 +7 (34922) 3-98-08
 Звонки по России бесплатны

СЛУЖБА ПО КОНТРАКТУ В ВС РФ

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
6 700 000 Р
 ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КОНТРАКТА НА ЯМЛЕ

Поблизости от других регионов возмещаются затраты на проезд от места проживания до г. Салехарда. В период оформления проживание в г. Салехарде и 3-разовое питание предоставляется бесплатно.

ОБУЧЕНИЕ:
 ✓ ОПЕРАТОРОВ БЕСПЛОТНЫХ ЛЕТАТЕЛЬНЫХ АППАРАТОВ
 ✓ ТАКТИЧЕСКАЯ БОЕВАЯ
 ✓ МЕДИЦИНСКАЯ ПОДГОТОВКА

3 600 000 Р единоразово от региона
 до 120 000 Р ежемесячно по федеральному

400 000 Р министерство обороны
 за обучение военного специального курса

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО ОТ 225 Т.Р

Дын тарма ляляссаңан



А.П. Загваздин ляль едпийн Асов курт рыбкоопан рупитас.

Хор: Владимир Енов

Щимащ водаң давартаң ляль талат пораятан Овас мувеван улты хоятат ал хун омассат, дый ищиты арсыр ляль харатан усат па ляляссат. Щалта ёдан хащам ёхат-нэңат, унашак ювам похат-эвет па пирщамам хоятат ищиты муй арат юр па щём тайсат, щи арат япсыена па вещьката рупитсат, лудан ляль порайт еша ваншака лэщаттыя.

Щи йисн, муң Дорвош район мувев, Омской область тахая ханшман тайса. Дув па туп уйтлор тылащн 14-мет хатадан Тюменской область мува велщи нох ханшса. Муң хоятлуд туп луң па сус пораятан лялясты тахаята акаттыя верытсайт. Щиты 1941-1945-мет талатан Дорвош районэв архив хоцца талаңа па япсыена 34-кем щимащ нэпек хащмал, мата отат хоцца щи райвоенкомат

Водаң Ляль шеңк ар нуша па ун шукаң вер тус. Ямкем ар хатнэху паратса. Куртатан па вошатан тухал хотат талаң тэлн нампра йисат. Советской Союз мувеван удам хоятат арсыр ляль харатан антома йисат. Итухал хатнэху немщатан ал щиты велсайт, кимет отат па концлагерь нэмпи тахаятан шукатсайт па шакаптасайт, лудан улапса хорасат талаң тэлн холты педа ёрэмасат.

тахайн Водаң Ляля тувам хоятат япсыена па нох ханшман ин тамхатл унты тайсайт. Щи нэпекатан 1281 ляля манам хатнэху па ул. Щалта Дорвош район военкомат тумпийн, Ямал мув округев элты ищиты муң хоццаева удам хоятат лялястыя тусайт, щи таха хоцца ултыя нэпекатан па япсыена дый нох ханшсайт.

Мосал ястаттыя, хоты Водаң Ляль ёхтам порайн Дорвош районэв элты лялястыя туп 229 хатнэху вохса. Щи ёхлуд кутан хулам нэ па улмал: кат руц ими па йи ханты нэ – Анна Антоновна Мартемьянова. Мет одаңан дый иса Омск вошан арсыр ляль верата туңа-щира уталтасайт. Юхат па айлдые нум муватан лэщаттам, лялясты тахаята тутаң ухлатан тусайт. Щиты елды 364 стрелковой дивизия щи порайн Одаңмет ударной армия тахая Северо-Западной фронт хоцца ус. Шеңк ар хатнэху рут мувев лавалты щи шукаң талатн яңхас. Щи йис пораятан Асов куртэван улты Марфа Алексеевна Фирсова хоттэл хоятлал элты лапат похал Водаң Ляля холдыена ияха мантсат. Аңкел ими щиты дыеда ястылдымал: «Туңа-щира па вещьката, похиет,

лялясаты па муват элты ёхтам немщат елды воштаты! Муң рут мувеван яма улты-холты лаңхалаюв». Яна щи, дув похлад шеңк вещьката па тарма ляляссат па иса холдыена, сыр-сыр ляль харатан паратсайт. Асов куртэв элты аратэлн 83 хатнэху Водаң Ляля манылдыс. 52 хоят ар тахаятан антома йисат, 31 ёх хоят ёхды педа ёхатсат. Итухал хатнэху элты тамхатл унты иса нэмолты айкел антом. Ищипа муң ёхлуд яма ляляссат па нох питсат тамащ Водаң давартаң Ляльн!

Тамхатл муң па кат ляльн удам хатнэху элты нынана айкел ханшлуд. Щит ханты нэңев Анна Антоновна Мартемьянова. Дув катра Муши вошеван 1922-мет талн сэма питас, юхат Асовн ус. Лялясты 1941-мет талн манас па ар тахайн лялясас. Ляль сохнам юпийн Пулңават вошан ус па йис пормасат шавиты хотан рупитас. Юхат 1985-мет талн Отечественной войны II степени нэм тайты орденан ун кущаятан катлаптаса.

Кимет хатнэху – Александр Павлович Загваздин. Дув па 1921-мет талн сэма питас. Ляль едпийн Асов курт рыбкооп хоцца рупитас.



Водаң Ляльн удам ханты нэ – А.А. Мартемьянова.

Хор: Владимир Енов

Лыпат тыдащ 22-мет хатадн 1942-мет талн ляль хара китса. Дув Калининской, Западной па Белорусской фронтатан ус. Япония хон мув пелакан ищиты лялясас. Лялясмад ураңан, арсыр мевал посат тайс: «За отвагу» талаң кат мевал пос, «За боевые заслуги», «За взятие Кенигсберга», «За победу над Германией», «За победу над Японией» па орден «Красной Звезды». Щиты муң Асов куртэван удам хоятат усат па тарма ляляссат.

Там хоятлуд Асов куртаң «Книга памяти» хоцца нэмлал ханшман улдаңан. Мата от 2025-мет талн ханшса.

Владимир Енов
ханшам потар



(Олаң шупал № 19 луңталн)

Панэ иттэнхэ йёх. Ёлнтахэ мўртахэ йёх. Щи льяль ёккё опяты ёлнтахэ раңипёх. Ёлтё тохихённё. Панэ щи ля́хэрнат ёлнтёл. Ёлнтахэ ма́чипёл.

Щи ими йастёл:

– Йа-а, тэми мўв арит атхэ-кятёлхэ йёх? Мант, вёлэ, имихэ вёйён. Щи ля́хэр мўват илэ ёнтё вёлэ? Мин вёлэ ёйқа вёллёмён. Икихёнимихён сохит қолха ёнтё волмён.

Щи ики, льяль ёккё йастёл:

– Йа, щя́қа, пёлёккё тө щи Масай ики тэм льяль йахламнё вёли. Мўв йёнкнё чикён? Тэхэ пар тэм қырёмтёл!

Щи ими йастёл:

– Йа-а, мўв торма́ли кирёхлёл? Ёй щи киврия́ ля́н кунтё. Мўв тора́ми ётёл? Ма́қа щи ля́хра илэ вёйё! Ёлнтёл мўрта йёх.

Мёта ма́рели умёс льяль ёккё, йастёл:

– Ёнтёқа пё чопёңқа, ёнтёқа! Тэм ар мёта атхэ-кятёлхэ йёх. Лилёң вол кунтё, ёнта, қовин ётёл тэхэ.

Йа-а, панэ щи ля́хэр илэ вёйтэх. Ёсса ёлнтёл мўрта йёх. Щи имил ёлтё тохия́ вёр. Панэ щи ёлнтмин латнё, ёс щи қонё, щи льяль ёккё, ля́хэр тэхэ поңёла паны. А щи Масай ики нўки қот пытёр кэм пёлёкнё омёлс, қёлёнтёл. Қёлёнтёл, а-а, ёлтё тохи вёрхён, панэ щи ёлнтхён.

Панэ ёлнтмин латнё, ля́хэр илэ вёйём сўй ётё лўв қолнё лёньмахёл, қёлилёх. Панэ пёхёлхёл. Товё мочё ылэ панмал латнё.

Панэ лўвнё щи нўки пёлёк кёчхинат пёлёккё виныщи ёлтё тохи йа́чёхи. Панэ щи льяль ёккё лўвнё кэм саккёли, кэм щи нёримты! Ёв савёли. Кэм нёримтётэх, ля́хрилёх-учлёл. Лўв щи Масай ики ётё ля́хэр ёнтё той. Панэ щи нула

питхён. Нул вёлтахэ, нулнам льяльёксётахэ. Ёнта, мўварит ат, мўварит қатёл нулнам, щи нул вёлхийёккён. Панэ ёй мёта латнё щи Масай икинё лўв ёнта лўв кёчёх, кёчхи вёс мўвёли ётё той. Щи льяль ёккё қутңилнё. Тёппё ёй мёта латнё щя́қа щи Масай икинё щи пи́хты. Кёчхинат увёл илэ саврёмтэх.

Мет щи пырнё щи имил вёй. Вёлилал-учлал аныйёх. Қайёми ёйхэ кит. Ёнта мўв арит щи вёлит щи льяльёң қё қутёңнё щи қытёх. Тысёл-вёхёл вёй. Ёвлал-қотлал вёй. Панэ щи имилнат пёрхи кирёхлёккён. Пёрхи тэм мёха йовётхён. Ну, щит пырнё ёс ма́рё щи йёминнат-щиньиннат волхён. Щит пырнё ёс ёвёс йах ёс пё щи лёки, щи Масай ики вёлтё мёхнам, лўв вёлтё йёңкёлнам, мёхёлнам, лўв вёлтё пухёлалнам-вочлалнам ёнтё йа́нқилёл. Метты, щиминт йасёң.

Аграфёна Сопочина ханшам потар

Хошам хатлат давдапса

– Наң хота шушилдысан?

Ёхлы пела туп ел няхалтам сый ёхтас.

– Ма наңен инцаслэм, хота шушилдысан? Ант рахал щиты улты, муң наңен щидэвалдэв, щидэвалдэв, аттыя олты ант верытлув, наң па камн отат пилан, амуй хота яңхлан! Охлуд кашия йисат, давдастыя!

Тови эви, лыпат элты верам па оха понам кусыед ёшан нёхтаслы па па щидэвалдэв няхалтас.

– Еспаул малы, муң хоццаев, ун кер тыдащ етшал! Наң щит элты нумасысан? Тура ёхатсаты, ясаң щах ант худантлаты! Я-та, ин пощтул похев хота ул?

Мув хорас ими пасан илпия мукардыйс па палал элты каталман Ун кер тыдащ похие элпа талсалды.

– Ма хой пела иса потарлам, наң тови пора мелака хатлаң тыдащ? Хой муй верам лонц? Хойн щиты улты партсайн?

– Аңкие, эслы-я, эслы! Каши ат ул! – Ун

лэщалад! Наң хота хошам мув сылат ерт такды вантысан? Велдци омпсам лэтот торандам холыена поталтаслан, щит муй ям? Щит наң дыпена лэщалад? Йи пуш туп ясталам, дыващдан актадан па хошам муват пела мана. Ин мохты мана, щёс шуп хащты кеман, дыл рувен тата ант ат хащал. Нюхматты питлан ки – хошам рув вохдам. Пунаң нови сахенан, етшатэн унты, рув кутан, воцла хуват шушилдыты питлан.

Пирац Тал ими хол ликащас, туп ищи па сохлад акатты манас.

– Ин па наң, – Мув хорас ими Тови пела керлас, – дапат хащты кеман мувев торнаңа па лыптаңа веры. Мувал па ат хошмал. Ерган шеңк ал шошми – манэм картопка холна омасты мосал.

Тови эвие па щидэвалдэв няхалтас.



Хор: Иван Сандрин

кер тыдащ похие хонтаты утцийс, туп Мув хорас ими аңкелан пал нёрмал мет таканшак ёвармаса,

– Ана-на, кашы-я, кашы!

– Хом пощтул няврэм, ма наңен инцаслэм, холца лонци пайт тусан?

– Лув мас! – Ун кер тыдащ похие, пирац Тал ими пела ёшад альсалды па па щидэвалдэв пасан илпия ханемас. Щидэвалдэв аңкел пела нялам эталтаман верантыйл. Щидэвалдэв кут па палдыйл, ал кашалада.

Пирац Тал ими па нёдал нохшак ханцарман, хошам нови сахалан ал омпсылдыйл, матты ки анта лув элтэл потар манал.

– Наң ин хота улты верэн ул? – Мув хорас ими ликащман пирац Тал ими пела нюхмантас. – Маты мув сыд олаңан улты верэн ул?

– Ант даңхалайм! – пирац Тал ими во-тэм охсохаң охал ёращманшак тувемаслы, – щита кашы хатл ерт щёщыйл, лонц щах антом. Манэм щах укщам, хулэң воцла мува курэман пурантты.

– Лувелд нэш укщам! Мув лувела ант

Сэмиел лап нямармаман, ов хоцца дойты Ас нопатты тыдащ пела керлас. Ун кер тыдащ похие щит кашаламан, Ас нопатты тыдащ пела машак аляс. Ин оталд сора ил ханемас.

– Отшам наң, щиты хой эви вана вохильмал,

– Ун кер тыдащ похие хоцца, ёлта ай Лун

апщел вана йис. Эвета хорам лыптит мойлаты мосал. Тови эвие лыпатан мойлаптасэн ки, лув лудан наң хоццаев йис. Ал щиты муй, уйтман лув Ас нопатты тыдащ хоцца манал. Лув лыптаң, хошам хатлаң, хорасаңшак тыдащ.

Ун кер тыдащ похие номпса питас. Амуйдал нумасман, луйдал менатман, торащдалан молты шитама потарман ил дойс. Щалта щидэвалдэв, шанш пелак хирал ил вуслы, хир овал нох эңхсалды. Хирал дыпийн ёхтысыты питас па ай хошам найие эталтас. Щидэвалдэв юпийн па, тови лонц пилан энамты каматса хорам лыпат, кунштэл восты юх лыпат па хорамаңа дарпилдыйм люм юх нови лыптит элпа талас.

Тови эвие венш сохал мохты щидэвалдэв хутламтас, щалта па хущасман, охсохлад ёшан тувемаслы па вана хатмас.

Овс мув сыдан турам вантты хоятат ох пат куншман кул номпса питсат. Турмев ахоты йис? Лонц шаңкап лодаты питас. Мувев хошам руван ёхатса...

Александр Горбов (Котобус) ханшам монц

Зоя Куртямова ханты
ясаң кератсалды



Вой велты пора

Кашң тови ёх хоятат шеңк самаңа давдаслат, хун тохлаң войт ёхатлат. Щи кеша ротая мосты пормаслаң лэщатладал. Туп пора ёхатад – мохты унта мандат. Щиты куртаң па вошаң ёх ёлан каматса лапат ант нылайт.

Тови пора, муң муеван, кашң хоят ялап тал емаң хатл иты даваладды. Хатлат хува йисат, мелак пора ёхтас. Щутщаты хатдтан хоятат рупитты ким этсат, хой картопка харлаң лэщатал, хой ов харлаң сыстамптал, хой па унта акташал.

Тови вой велты пора – шеңк ям пора. Тал порайн омасты метла, шука йил. Каш верман, пора хайман унта яңхда. Товийн унтан шеңк умащ, ялап торнат этлат, щикет щёвилат, камн хорпи ар вой нох этал. Номас ям.

Куртаң, вошаң ёх самаңа унта вой велты мандат. Тал сыс айлта пошкандал туңащира лэщатладал. Патронат лутты ун вошата яңхлат. Хой кум ант шитал, ёлан верал, туп пошкан нёд па щеля мосал. Тови кеша ёх хоятат, хой рупитал, нэман рупата элты щутщаты хатлат вулат. Уншак ёх, хой пенсияйн удлат, ал щиты ант омаслат. Лув мет олңа унта мандат. Сохал хотдал



Хор: Алексей Лонгортов



мет ям эплаң лэтот, луң сыс сопасдыман тайты рахал, потам хот ант мосал. Щиты вулэң ёх верлат.

– Ма кашң тови сыс кум шитман, вой велты унта яңхдам. Ай тэдан духасдам пидан щиты уталсам, – Алексей Лонгортов ястал. – Унта манты елпина, олаңан, пошкан нэпекат туңащира лэщатты мослат. Щи тумпина охотничий билет па мосал. Антом ки, мильцайн каталдайн, пошканэн нох вула. Кашң

мосты щира лэщатладал, сорам юх акатлат, иса муй мосал верлат.

па ущ тылащ 5-мет хатл унты пуншман питал.

Тови сыс ёх хоятат морт араткем вой мошатлат. Ялап васы нёхи пилна ёхи ёхатлат. Хой ал щиты потам хота пондалды, мосты порайн ким талдалды па кавартладалды. Хойтат нёхи хошап верлат. Щит

пошкан утща нэпек тайл. Унта манты ураңна нэпек ханшлатты мосал, хота ханшман ул, муй арат васы па лунтат наңен мошатты рахал. Щи нэпеклан иса патан тайты мослат. Унтан ки мильцайн кашадаладын, нэпеклан эталтылдан. Туңащира ки лэщатысан, еллы эсалдайн. Щишан, нэпек тайман, ант хурман вой велты манлан. Ма васы мошаттэм юпийн, омастэм сыс, мохты нох сухатлэм, пундал унтан хайдалдам. Ёлан ищи рупатайң сухатты, пундал тытохи хот хуват тулайт. Тамиты ям, лэщатам васы мохты потам хота понлэм, мосты порайн ким талдэм, кавартлэм. Ялап дант лэвман нумалмадам, хоты яма унта яңхсам.

Там йис муй мосал лэщатты

Тампуш вой велты пора Ас нопатты 16-мет хатл элты



Хор: Иван Сандрин

Иван Сандрин ханшам потар

Газета
«ЛУХ АВТ»
Адрес редакции:
629003, ЯНАО,
г.Салехард,
мкр. Богдана Кнуянца,
д. 1, каб. 106
+7 (34922) 4-68-63
E-mail:
luh.avt@yamal-media.ru

Учредитель
Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д. 9, каб. 708)

Газета зарегистрирована
Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 163 тз
Подписные индексы:
на год – ПА700, на полугодие – ПР561

№ 20 (1323)
Газета вышла в свет 16 мая 2026г.
Подписано в печать 14 мая 2026г.
по графику: 16.00
фактически: 16.00
Газета выходит по субботам

Цена годовой подписки 88 руб.,
в розницу не распространяется

Издатель
Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб. 708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнуянца, д. 1, каб. 106
Фактический адрес: 629007, Ямало-
Ненецкий автономный округ, г. Салехард,
ул. Чубынина, д. 39А

Генеральный директор
АНО «Ямал-Медиа»
Зулинова
Марья Андреевна

Главный редактор
Яковлева
Аллина Кирилловна